



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDICIAL

Komunikadu Imprensa

Periodu : Agostu 2011
Edisaun : 12 Agostu 2011

Arguidu ba kazu violasaun seksuál hetan pena tinan 15 prizaun

Iha loraon 10 Agostu 2011 Tribunál Distrital Dili hala'ó audiénsia julgamentu hodi lee leitura akordaun ba kazu violasaun seksuál ne'ebé mak rejistadu iha tribunál ho numeru prosesu 269/C.Ord/TDD/2011. Kazu ne'e komete husi arguidu ES hasoru lezada GDS ne'ebé mak sei iha idade tinan 15 momentu akontesimentu.

Julgamentu ne'e derije husi Juiz Deolindo do Santos ne'ebé mak representa juiz painel sira seluk, hanesan Juiz Antoninho Goncalves no Juiz Guilhermino da Silva. Husi parte Ministériu Públiku representa husi Dr. Felismino Cardozo no husi parte defeza, representa husi Dr. Jose da Silva husi Eskritoriu Defensória Públika.

Diretór JSMP Luis de Oliveira Sampaio haktuir katak” *Tribunál sira kontinua hatudu progresu boot iha kontestu luta hasoru violénsia kontra fetu ka violensia bázeia ba jeneru sira; ne'e pasu significativu tebes iha setór justisa ne'ebé ita hotu merese atu apresia no kongratula dezempeñu ida. Aleinde, progresu ida ne'e la ses husi eforu Ministériu Públiku ne'ebé konsege rekolla no apresenta provas hotu-hotu relasiona ho kazu ne'ebé mak ikus mai bele konvense tribunál hodi hamonu pena ne'ebé mak merese no realistiku ba arguidu”.*

JSMP hanoin katak “pena ne'ebé mak tribunál kondena ba arguidu refléta sensibilidade autór tribunál ba kazu krime sira kontra fetu, liu-liu krime kontra menor idade. JSMP mós espera katak ho pena ne'ebé mak hamonu ba arguidu, sai hanesan meius ida mós atu eduka ita nia sociedade hodi hadook-an husi hahalok violénsia, liu-liu violasaun seksuál hasoru fetu.

Bázeia ba faktus ne'ebé mak produs durante julgamentu ba kazu ida ne'e, provadu katak arguidu komete duni aktu violénsia seksuál hasoru lezada ho hahalok hanesan, lori lezada ba iha kuartu laran hodi hasai hotu lezada nia roupa no halo violasaun seksuál hasoru lezada. Ikus mai lezada isin rua no hahoris bebe oan nain rua (kaduak).

Tribunál hamonu pena tinan 15 prizaun, tuir akuzasaun Ministériu Públiku nian ne'ebé mak bázeia ba artigu 172 no 173 (d) Kódigu Penál Timór Léste.

Maske nune'e, arguidu sei iha oportunidade atu hato'ó rekursu ba iha tribunál rekursu iha loron 15 nia laran, tuir lei prosesual.

Atu hetan informasaun klaru, favor kontaktu;

Luis de Oliveira Sampaio

Direitór Ezekutivu JSMP

E-mail: luis@jsmp.minihub.org

Landline: 3323883